

Streetcars a transporta mas di 350 mil persona



ORANJESTAD – Diferente na e pronosticonan pesimista di esunnan cu no kier a wak e renacemento di Oranjestad como centro comercial y atraccion turistico bira un realidad; e streetcars a demostra nan derecho di existencia.

Cifranan concreto tuma diariamente ta duna un bista di e servicio unico cu nos isla ta ofrece na su bishitante y habitantenan. Te cu februari ultimo, e tramnan a registra 357 mil 659 pasahero. Compara cu e mesun luna na 2014, a registra un aumento di 25%.

Tur esaki mientras cu e plan pa revitalisacion di centro di ciudad ta den desaroyo pa yega na su potencial maximo. Mester tene na cuenta cu proyectonan manera Plaza Padu, Welcome Plaza dilanti di waf y e ampliacion di waf



crucero pa aumenta e capacidad di barco cu por ricibi, ta den ehecucion.

Asina mes, den un aña, djis un di e streetcars den operacion a transporta mas persona cu e poblacion completo di nos isla. Cifranan ta muestra cu un total di 166 mil 92 hende a core den e streetcar blauw durante 2014.

Solamente den luna di december ultimo e tramnan a registra mas di 29 mil persona. Esaki indubablemente ta



muestra cu e sistema di tram a hunga un papel importante den e temporada di compras di fin di aña, hibando consumidornan na e diferente puntonan di caya principal.

E di tres streetcar ta yega Aruba den e proximo dos simanan pa asina drenta di biaha den operacion. Hunto cu e dos existente, nan ta core riba un sistema di circulacion cu ta coordina cu exactitud pa medio di computer. E ta reduci e tempo cu usuarionan ta warda na e diferente stop riba e ruta entre waf y fin di caya grandi.

E ta yega net na tempo pa e temporada di vakantie grandi caminda tanto turista como local por disfruta di dje. Sea ta pa conoce centro di ciudad, haci compras den caya of conoce e ruta monumental di Oranjestad, e streetcars ta ofrece un opcion diferente pa aprecia e cambio grandioso cu Caya G.F. Betico Croes y resto di Playa a conoce durante ultimo añanan. □